

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Mizoram Tipper Association District Hqrs Kolasib in vawiin a ni 3-na thleng khan Kawnpui leh Sairang inkara Kawng chhe zual lai siam that hnatlang an thawk.
- 2. Mizoram Polytechnic Lunglei building luahman sorkarin a bat chungchangah Lunglei MZP leh Congress Party chuan hma la vat turin sorkar an phut.
- 3. BJP Mizoram President Pu Vanlalthmuaka’n Mizoramin mahni thutiama ding leh tihtur sawi ang ti thin mi ram hruaitu a mamawh a ti.
- 4. Vawiina Pakistan-a thih chilh bomb hmanga inbeihna-ah Pakistan sipai 16 an thi.



MTA

Mizoram Tipper Association (MTA) District Hqrs Kolasib in, National Highway No. 06 leh 306 huam chhung Kawnpui leh Sairang inkara Kawng chhe zual lai siam that hnatlang, tunkar Ningani atanga an neih chu vawiin khan a ni thumna atan an chhunzawm.

MTA, Kolasib District Hqrs hruaitute hnen atanga thudawn dan in, tukin tukthuan eikham atang khan hnatlang hi tan leh in, Kawnpui Lung Quarry atangin Lung (boulder) an phur a, Kawng chhe zual lai ah chhek khawm in, Kawng chhe lai hnawh hnatlang chu karleh Thawhtanni khian an thawk leh dawn a, vawiin chawhma lam thleng khan Lung cubic metre 300 atanga 400 zet an chhekkhawl tawh. Lung hi cubic metre khatah Rs 800/- zel in an lei khawm a, an sum senso pawh a tam tham hle tawh niin an sawi. Vawiin hian Kawng hnawh hna thawk lovin, karleh Thawhtanniah chhunzawm leh an tum a ni.

MTA hruaitute chuan ni thum zet Kawngpui chhe zual lai thawmtha a hnatlang an neih tawh hnuah sorkar atangin thu leh hla engmah an la dawn loh thu an sawi a, hetihlaia sorkar in Kawnpui - Aizawl via Durtlang Road (tlang kawng) ah Buhfai phur lirthei lian chi a kal tir ta mai chu hriatthiam harsa an

tih thu an sawi a. He tlang Kawng hi lirthei lian tlan phal lohna a nih avangin chetsualna a thlen palh an hlahu thu an sawi bawk.

Vawiin vek khan Mizoram Pradesh Congress Committee chuan thuchhuah siamin, ZPM sorkar chuan Mizoram chak lakna kawngpui chu a ngaihsak tawk lo niin an sawi a, a bik takin Mizoram chak lakna ber Khamrang - Sairang kawng sorkarin a ngaihsak lo chu pawl an ti tih an sawi a ni.

Kawngchhia hi Lirtheia eizawngte tan mai bakah damlohna avanga hmanhmawh thil a veivak mipuite ngaihsak lohna nia sawiin, kawng siamna atana chhia hetl zat la si a kawng an ngaihsak lo chu pawl an ti a, a rang thei ang bera hma la turin leh Lirthei neitu mipui ngaihsakna thinlung pu turin sorkar an phut a ni.

(Andrew Vanlalauva, Kolasib PTC & PR)

MP RICHARD

Member of Parliament Pu Richard Vanlalmangaiha chuan nimin khan Food Corporation of India (FCI) Chairman Ashutosh Agnihotri chu a office-ah a kawm a, FCI Godown chungchang te leh Buhfai rang zawka a rawn kal theih dan turte an sawi dun.

Mizoram Lok Sabha MP chuan OMSS(D) approval muang lutuk te, approve a nih hnu pawh a Releasing Order (RO) chhuak har lutuk thin leh, RO muan lutuk avanga buhfai supply a khaihlak phah thin thu te FCI Chairman hi hrilhin, Mizoram chhunga labour tlem avanga local transportation a muan thu te bakah hian Sairangah Relin buhfai a lo phurh luh vat theih nan FCI Godown chu a rang lamin peih vat nise tiin a ngen a. Mizoramah FCI Regional Office din hma theih nise tiin a ngen bawk a ni.

FCI Chairman chuan North East lam enkawltu te ko nghalin an harsatna te pawh a rang lama lo enpui a, chinfel a nih vat theihna turin hma alo lak tur thu a lo hrilh a ni.

<><><>

LUNGLEI POLYTECHNIC

Lunglei Mizo Zirlai Pawl Headquarter leh Lunglei District Congress Committee te chuan, Mizorama Diploma Engineer zir theihna hmasa ber - Mizoram Polytechnic Lunglei chu court order-a a vawi hnihna atana kalhsak leh an ni chu pawl a ti hle tih an sawi.

Lunglei District Court chuan Lungleia Mizoram Polytechnic chungchangah sorkar chu cheng nuai 88 sing 3 leh 3268 chawl turin a hriattir a, court thu angin Mizoram Polytechnic-a building hrang hrangte chu June 27, Zirtawpni khan khalh a ni.

Lungleia Mizoram Polytechnic ram luah man hi kum 1992 atang khan pek a ni lo a, chumi nghawng kal zel chu a ni. Tun hnai khan Mizoram Polytechnic Principal Lalnuntluanga chuan Higher & Technical Department

chuan Finance-ah cheng nuai 88 sing 1 leh 3,268 hi sanction turin a dil mek tih a sawi a ni.

MZP thuchhuah tarlan dan chuan, Mizoram zirna in pawimawh ber pakhat - Mizoram Polytechnic Lunglei buaina chungchanga sorkarin hma a la chak tawh lo leh, buaina ching fel tura hun tiam pek chhung pawha thuneitute lam atanga ngaihven a hlawh lo chu pawl an ti tih sawiin zirlai tam takin an tuar hmaa hma la vat turin Mizoram sorkar chu an ngen a. Mizoram Polytechnic Lunglei hawn a nih leh vat theihna atan theih tawp chhuahin, a tawp thlengin hma an la chhunzawm zel dawn a ti.

Lunglei District Congress Committee pawhin thuchhuah siamin, July ni 9 hi Mizoram Polytechnic zirlai ten zirna an tan hun a nih leh mai tawh avangin an harsatna tawh chu Mizoram sorkarin a rang lama chin felsak thuai turin an ngen a, computer zirlai kum tin mi 30 vel lak thar an nih laia Computer sawm emaw chauh an nei tih sawiin, an harsatna te chinfelsak turin an ngen tih an sawi bawh.

<><><>

AMC

Aizawl Municipal Corporation (AMC) leh Aizawl Tennis Court kiang vela chawhmeh zuarte inkara buaina chu chinfel a la ni lo a, tukin lam pawh khan an innawr leh a ni.

AMC Deputy Mayor Pu Lalringliana hnen atanga Akashvani Aizawl thudawn danin, AMC chu a dinna ngaiah a la ding reng a, ruahman dan chuan July 1, Thawhlelni hian UD&PA Minister leh AMC Mayor te bakah mi pawimawh hrang hrang te nen an sawi ho leh dawn a ni.

Zirtawpni zan khan Aizawl District chhunga khaw hrang hrang bakah Aizawl Tennis Court bul hnaia chawhmeh zuar thinte chu an tih thin dan pangngaiin an kalkhawm leh a, mahse AMC thuneitu lamin inzawrh an phal lohna hmun a nih avangin AMC lamin an dang thung, tlaivarin an indang a, tukin zing dar 9 thleng vel thleng khan indangin a hnuah erawh chawhmeh an zuar chhunzawm leh ta tho a ni.

(Voice Cast)

(Kar hmasa leh a hma lama thu awm tawh angin AMC chuan Aizawl Tennis Court leh a chhehvel kawng dungah hian chawhmeh zawrh an phal lo a, khaw hrang hrang atanga kut hnathawktu ten Inrinni atan chauh chawhmeh zawrh nan a hmang thin thung. Kut hnathawktu tute hian AMC lamin an thlai zawrhna tur atana hmun an siamsak chu a zim a, an leng lo niin an sawi a. Tukin zinga AMC lamin an dan avang hian nidang aiin an chawhmeh zawrh te chu hralh a harsa deuh niin an sawi)

<><><>

11 YEARS OF NDA GOVT

BJP Mizoram President Pu Vanlalhmuaka’n Mizoramin mahni thutiama ding leh tihtur sawi ang ti thin mi ram hruaitu a mamawh a ti.

Akashvani Regional News Unit chuan kum 11 chhunga NDA sorkar hmalakna chungchangah BJP Mizoram President Pu Vanlalthmuaka leh Pachhunga University College a Political Science department Asst. Professor Dr Zonunmawia te a kawm a. BJP Mizoram President chuan NDA hnuaiah eirukna a tlem tih sawiin eirukna chu mipuite hmasawnna daltu a nih avangin eiruk awm lohna sorkar din chu an tum ber a ni a, hei hi sorkar hmasa aia an danglamna a ni a ti.

Mizoram pawhin mahni insawi anga ti thin ram hruaitu a mamawh tih sawiin BJP kaihhruai sorkar laipui chuan Mizoramah hmasawnna nasa tak a thlen a ni a ti a, Sairang thlenga rel lut thei tur leh kawngpui lian tak tak awm bakah Tuirial Hydel project hlawhtlinna hmuh chhoh mek a ni a , Lengpui Airport chu Union Home Minister Amit Shah an Mizo mipuiin changkang zawk leh International Aiport ni tura an duh avangin Airport Authority of India in a lak a ngai tih sawiin Chief Minister Pu Lalduhoma ko thla in, a hrih tih a sawi.

Byte: BJP Mizoram President Pu Hmuaka

Dr Zonunmawia chuan Prime Minister Modi-a kaihhruaina hnuaia India-in tunlai thiamna a hman tangkai zia sawiin, thingtlang kilkhawr berah pawh pawisafai hmang kher lovin, Gpay hmangin pawisa a in thawn theih tawh a ti a, sorkar atanga hamthatna dawn thin, Gas subsidy chu bank account-ah a lut thei tawh tih sawiin lehkha pawimawh chu E-file system a kalpui a ni tawh a ti a, RTI chu online a tih theih ani tawh tih sawiin digital lama sorkar laipui hmalakna chu mipuiten an hriat a tul hle tih a sawi bawk.

Byte: Dr Zonunmawia

Kum 11 chhunga Prime Minister Modi-a kaihhruai sorkar hmalakna hrang hrangte hi Mizoram chuan thil tam takah a chhawr mek a, Sorkar laipuiin chenna in zawng zawng tui connection an neih theihna tura a hmalakna, Jal Jeevan Mission hnuaiah Mizoram sorkarin thingtlang khaw hrang hrang a pek theih lohna khuaah tui hnianghnar taka pek mek a ni a. Ram pum huapa faina beihpui thlakna, Swachh Bharat Mission hnuaiah inthiarna vbc 12 sak a ni tawh tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SUICIDE ATTACK AT NORTH WEST PAKISTAN :

Vawiina Pakistan-a thih chilh bomb hmanga inbeihna-ah Pakistan sipai 16 an thi.

Pawikhawihna thlenna hmun hi Pakistan hmar thlang lam niin sipai convoy a motor inzui chu motor pakhatin sut chilhin a sut chilhtu hian a bomb pai chu a ti puak nghal a, hriat theih chinah sipai 16 an thi a, an ni bakah hian civil mi 19 leh sipai 10-in hliam an tuar a ni.

Pakistan thuthar thehdarh tute sawi danin he pawikhawihna hi Pakistan Taliban lam tang Hafiz Gul Bahadur hel pawlten an ti ni a an chhal thu an sawi.

<><><>

MANN KI BAAT :

Prime Minister Narendra Modi an naktuk Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

GOVT DENIES WATER TAX FOR AGRICULTURE :

Sorkar laipui chuan lo neihna atan leh thlai chinna atana tui lak man awmtir rawtna a hnawl.

Jal Shakti Ministry thuchhuakin a tarlan danin Modernization of Command Area Development and Water Management Scheme hnuaia lo neihna atana tui lak chungchanga chhiah chawi rawtna awm chu hnawl a nih thu tichhuah a ni a, he scheme thar hi lonuten hnianghnar zawk leh fumfe zawka an thlai chinte chawmna tur tui an hmuh theihna tur atana duan a nih thu an sawi bawk.

<><><>